

DOMINGO 21 ORDINARIO CICLO B

PRIMEIRA Xos 24, 1-2a. 15-17. 18b

Serviremos ó Señor, porque El é o noso Deus

PROCLAMACIÓN DA PALABRA RECOLLIDA NO LIBRO DE XOSUÉ

Xuntou Xosué a todas as tribos de Israel en Xequem, e chamou aos anciáns de Israel, aos xefes, aos xuíces e mais aos oficiais, e presentounos diante de Deus. E Xosué falou a todo o pobo deste xeito:

- Se vos anoxa servir ao Señor, escollede hoxe a quen ides servir: se aos deuses que serviron vosos pais na outra banda do río, ou aos deuses dos amorreos, os da terra que habitades. Eu e maila miña familia serviremos ao Señor".

E respondeu o pobo:

- "Lonxe de nós arredármonos do Señor para servir a outros deuses, pois o Señor, o noso Deus, fíxonos subir a nós e a nosos devanceiros da terra de Exipto, da casa do asoballamento, e fixo diante de nós aqueles grandes prodixios e protexeunos ao longo de todo o camiño que percorremos, e máis por todos os poboados por onde pasamos. Así que tamén nós serviremos ao Señor, pois El é o noso Deus".

SALMO RESPONSORIAL Sal 33, 2-3. 16-17. 18-19. 20-21. 22-23

R/ (9a): Gustade e vede que bo é o Señor

Eu bendigo ao Señor en todo instante,
teño sempre na boca a súa louvanza;
gloríome no Señor,
e os humildes alégranse, ao escoitalo.

Os ollos do Señor están cara aos xustos,
os seus oídos cara ao seu clamor;
mais o Señor mira con enfado aos malvados,
para borrar da terra a súa memoria.

Claman aqueles, e o Señor escoita,
líbraos de todas as angustias.
O Señor está preto do aflixido,
salva ao asoballado.

Moitos son os males dos xustos,
pero de todos os libra o Señor.
El coida dos seus ósos,
nin un só romperán.

A maldade mata ao impío;
quen aborrece os xustos será castigado.
O Señor redime os seus servos:
non será castigado quen a El se acolle.

SEGUNDA Ef 5, 21-32

Este é un sacramento grande, falo de Cristo e da Igrexa

PROCLAMACIÓN DA PALABRA RECOLLIDA NA CARTA DE SAN PAULO APÓSTOLO AOS EFESIOS

Irmáns e irmás:

Sede ben guiados uns cos outros por respecto a Cristo: as mulleres sométanse aos propios maridos, coma se fose o Señor, pois o marido é cabeza da muller, coma tamén Cristo é cabeza da Igrexa, o salvador do corpo. E, coma a Igrexa se somete a Cristo, así tamén as mulleres aos seus maridos, en todo.

Homes, amade as vosas mulleres, coma tamén Cristo amou a Igrexa e se entregou por ela para santificala, purificándoa co baño de auga na palabra, e para presentala deste xeito diante de si, radiante, sen lixo nin enrugada nin cousa polo estilo senón santa e inmaculada. Así deben tamén os maridos amar as súas mulleres coma os seus propios corpos. Quen ama a súa muller, ámase a si mesmo, porque ninguén odiou endexamais a súa propia carne senón que a mantén e aquece, como fai Cristo coa Igrexa, porque somos membros do seu corpo.

Por iso deixará o home a seu pai e maila súa nai e unirase á súa muller e serán os dous un único ser. Grande misterio é este e eu refíroo a Cristo e á Igrexa.

ALELUIA Cf Xn 6, 63c. 68c:

As túas palabras, Señor, son espírito e vida; tes palabras de vida eterna.

DOMINGO 21 ORDINARIO CICLO B

EVANXEO Xn 6, 60-69

E onda quen imos ir? Ti tes palabras de vida eterna

PROCLAMACIÓN DO SANTO EVANXEO SEGUNDO XOÁN

Moitos dos discípulos de Xesús dixeron:

- ¡Que dura é esta doutrina! Quen pode admitir tal cousa?

Comprendendo Xesús que os seus discípulos murmuraban do asunto, díxolles:

- Escandalízavos iso? E logo se visedes o Fillo do Home subindo a onde estaba antes? O espírito é quen dá vida, a carne non vale para nada; as palabras que eu vos falei, son espírito e son vida. E, aínda así, hai algúns de vós que non cren.

Pois ben sabía Xesús desde o principio quen eran os que non crían e máis quen o había de entregar. E proseguíu:

- Por iso téñovos dito que ninguén pode vir a min, se non llo concede o Pai.

Desde aquela moitos dos seus discípulos botáronse para atrás, e xa non andaban con el. Preguntoulles entón Xesús aos Doce:

- Vós tamén vos queredes ir?

Respondeulle Simón Pedro:

- Señor, e onda quen imos ir? Ti tes palabras de vida eterna, e nós cremos e recoñecemos que ti es o Santo de Deus.